

Projek MRT kini masuki fasa pembinaan aktif

PETALING JAYA – Mass Rapid Transit Corporation (MRT Corp) mengumumkan projek infrastruktur terbesar negara, Sungai Buloh-Kajang Mass Rapid Transit Line sedang berjalan mengikut jadual yang ditetapkan.

Projek itu kini beralih daripada kerja-kerja penyediaan kepada fasa pembangunan aktif, kata Pengarah Komunikasi Strategik dan Perhubungan Awam MRT Corp, Amir Mahmood Razak.

“Sejak jajaran Sungai Buloh-Kajang diputuskan pada Julai tahun lepas, perancangan, reka bentuk dan kerja-kerja penyediaan untuk pembinaan, sudah berjalan sepenuhnya,” katanya dalam kenyataan yang dikeluarkan di sini semalam.

Menurutnya, sehingga kini, sebanyak 33 pakej bernilai RM15.5 bilion sudah diluluskan untuk pakej satu Sungai Buloh-Kajang Line.

Tambah beliau, MRT Corp akan mengumumkan projek baharu menjelang akhir tahun untuk Sungai Buloh ke Kajang yang mana ia termasuk pembelian tren, jambatan dan pembinaan stesen.